

Escrito por
Luns, 24 Xullo 2006 05:36

As asociacións de veciños do concello de Nigrán “A Unión” de San Pedro, “O Castro” de Chandebrito, “Dunas” de Nigrán, “Monteferro” de Panxón, “Outeiro” de Parada, “A Irmandade” de Priegue, A. VV. de Camos e a A. VV. Arribas Brancas, Seixos Negros e Portocelo reuníronse en assemblea o xoves 13 de xullo para elaborar unha resposta ó ofrecemento do alcalde de Nigrán de Nigrán en relación coa resolución do conflito xerado polo PXOM proposto pola equipa de goberno.

Esta resposta ven dada ante o ofrecemento do rexedor a que sexan directamente as AAVV de veciños as que redacten o PXOM de Nigrán; unha idea non compartida que sentou malestar nos portavoces xa que entenden que son responsabilidades unicamente competentes aos concellais e técnicos do concello, responsabilidades que consideran deben ser asumidas.

O PXOM de Nigrán continúa sen estar aprobado inicialmente, despois da revolta veciñal do mes de xuño e a multitudinaria manifestación que provocou cambios e a rotura do bipartito de goberno.

As asociacións de veciños solicitan novamente “transparencia” e “participación cidadá” para a defensa dos seus intereses e valores no que atinxe á redacción do PXOM. Así citan no seu escrito:

“Que de conformidade co establecido no Artigo 4º da Lei 9/2002 do 30 de decembro (D.O.G. do 31 de decembro de 2002), de ordenación urbanística e protección do medio rural de Galicia onde textualmente se cita “Velar para que a actividade urbanística se desenvolva promovendo a máis ampla participación social, garantindo os dereitos de información e de iniciativa dos particulares, asegurando, en todo caso, a participación dos cidadáns e das asociacións por estes constituídas para a defensa dos seus intereses e valores”,

As asociacións manifestaron o seu firme compromiso a traballar para acadar un Plan Xeral de Ordenación Municipal acorde ós intereses dos veciños e veciñas de Nigrán dende o consenso e a transparencia e solicitan a redacción dun novo PXOM libre de sospeitas.

Así mesmo, os representantes veciñais piden á Equipa de goberno que convoce a tódolos partidos políticos con representación para que acaden unha postura pública sobre o futuro actual do PXOM que se pretendía aprobar o 2 de xullo.